

《雜阿含 302 經》

大正 302/印順 483/佛光 340 (因緣 SN12.17)

如是我聞：一時，佛住王舍城耆闍崛山。

爾時，世尊晨朝著衣持鉢，出耆闍崛山，入王舍城乞食。時，有阿支羅迦葉，為營小事出王舍城，向耆闍崛山，遙見世尊。見已，詣佛所，白佛言：「瞿曇！欲有所問，寧有閑暇見答與不？」

佛告迦葉：「今非論時，我今入城，乞食來還，則是其時，當為汝說。」

第二，亦如是說。第三，復問瞿曇：「何為我作留難！瞿曇！云何有異！我今欲有所問，為我解說！」

佛告阿支羅迦葉：「隨汝所問。」

阿支羅迦葉白佛言：「云何，瞿曇！苦自作耶？」

佛告迦葉：「**苦自作者，此是無記。**」

迦葉復問：「云何，瞿曇！苦他作耶？」

佛告迦葉：「**苦他作者，此亦無記。**」

迦葉復問：「苦自、他作耶？」

佛告迦葉：「**苦自、他作，此亦無記。**」

迦葉復問：「云何，瞿曇！苦非自、非他，無因作耶？」

佛告迦葉：「**苦非自、非他、無因作者，此亦無記。**」

迦葉復問：「云何，瞿曇！所問苦自作耶，答言無記？他作耶，自、他作耶，非自、非他、無因作耶，答言無記？今無此苦耶？」

佛告迦葉：「**非無此苦，然有此苦。**」

迦葉白佛言：「善哉！瞿曇說有此苦，為我說法，令我知苦、見苦。」

佛告迦葉：「若受即自受者，我應說苦自作；若他受，他即受者，是則他作；若受自受他受復與苦者，如是者自他作，我亦不說；若不因自他，無因而生苦者，我亦不說。離此諸邊，說其中道。」

「如來說法，此有故彼有，此起故彼起，謂緣無明行，乃至純大苦聚集。[此無故彼無，此滅故彼滅，謂]無明滅則行滅，乃至純大苦聚滅。」

佛說此經已，阿支羅迦葉遠塵離垢，得法眼淨。

時，阿支羅迦葉見法，得法，知法，入法，度諸狐疑，不由他知，不因他度，於正法律，心得無畏。合掌白佛言：「世尊！我今已度。我從今日，歸依佛、歸依法、歸依僧，盡壽作優婆塞，證知我！」

阿支羅迦葉聞佛所說，歡喜隨喜，作禮而去。時，阿支羅迦葉辭世尊去不久，為護犢犍牛所觸殺。於命終時，諸根清淨，顏色鮮白。

爾時，世尊入城乞食。時，有眾多比丘，亦入王舍城乞食，聞有傳說：阿支羅迦葉從世尊聞法，辭去不久，為牛所觸殺；於命終時，諸根清淨，顏色鮮白。

諸比丘乞食已，還出，舉衣鉢，洗足已，詣世尊所，稽首禮足，退坐一面，白佛言：「世尊！我今晨朝，眾多比丘入城乞食，聞阿支羅迦葉，從世尊聞法律，辭去不久，為護犢犍所觸殺；於命終時，諸根清淨，顏色鮮白。世尊！彼生何趣？何處受生？彼何所得？」

佛告諸比丘：「彼已見法，知法，次法，不受於法，已般涅槃，汝等當往供養其身。」

爾時，世尊為阿支羅迦葉授第一記。